

四庫全書

集部

欽定四庫全書

集部

尚絅齋集卷三

五

詳校官庶吉士臣朱理

中書臣劉源溥覆勘

總校官庶吉士臣倉聖麟

校對官中書臣嵇承志

謄錄監生臣華光楫

欽定四庫全書

尚絅齋集卷三

明 童冀 撰

南行集

五言古詩

過洞庭

嘗聞楚粵交積水之所匯我來當五月雨過百川會滄
淪詎有底磅礴信無外日月互吞吐風雲時濺灑夷夏

斯界限江漢相襟帶吳檣與蜀桅飄忽風雨快平生獨
注意頗覺空眼界孰云吞八九胸中不芥蒂行當登日
觀一覽瀛海大

夜雪簡王雪舟

兒時不識愁見雪喜欲顛長大頗不喜所望在有年蹉
跎齒髮暮况乃憂患煎一身去鄉國道里踰五千北風
昨夜起積雪被南天故鄉美醪醑不到蓬窓前頗聞王
子猷夜泛湘江船豈無戴安道掩關方醉眠人事每如

此遠客殊可憐

七言古詩

送胡琪之富陽

琪永康邑人永康有花溪西北流入雙溪

花谿水下雙溪遙遙百里西南馳北折蘭皋復東驚却
繞金華山下路金華山色年年青年去年來相送迎我
家金華山色裏與子共歡雙溪水去年送子作賢良握
手一笑溪水傍今年我亦金陵去邂逅錢塘復相遇錢
塘江上三日留送子又登江上舟富春南望未百里江

流猶是雙溪水我今暫別行當還扁舟還過富春山好
買江魚釀江酒同向春風開笑口百年歡樂能幾何一
年春色成蹉跎明年子亦作歸計衡門待子重相過

謁卞將軍祠

五湖雲擾麇中原五馬渡江江欲渾關中帝子已北狩
洛下士族爭南奔新亭英雄相對泣國體艱危僅能立
姑熟甫見橈槍沉歷陽又聞驍騎入江左夷吾身退高
廊廟重臣劉與刁幼君母后等孤注元舅鼠伏先遁逃

將軍精忠貫白日氣吞餘子前無敵身冒白刃如無人
此身不知知有國二子從父身爭先父前子後同九泉
當時豪傑誰不死一門忠孝今千年六朝往事隨流水
將軍至今猶廟祀世間萬事等飄風只有忠孝傳無窮

過安慶謁余忠宣公祠

舒州城小如堵牆舒州城外皆戰場遺民千百多殘創
官中况復無餼糧余公東來植綱常民心險固踰金湯
開門四野煙塵黃青天白日騰虎狼公執忠義為鋒鋌

追奔逐北如驅羊羣盜出沒猶披猖蜂屯蟻聚稱侯王
孤城屹立當中央羽檄徵兵驚四方援師不至振復僵
此身真與城俱亡舉室效節沉滄浪聲名日月齊輝光
新朝褒忠勸貞良作廟秩祀嚴烝嘗平原睢陽遙相望
雲車風馬參翱翔我嘗拜公荆水傍繡衣玉節何煌煌
今公遺像儼在堂九原不作涕四滂秋菊春蘭薦馨香
歲時奔走來巫陽江水日夜東流長遺民千古心弗忘

過賈太傅廟遺址

洛陽年少古希有誰其薦之河南守聲名一日傾京師
漢廷無人出其右是時天下方治平朝廷柄用皆老成
惟生新進談世事開口磊落令人驚流涕未已復太息
絳灌諸人豈相嫉不愆不忘循舊章法令紛更果何益
一官迢遞來長沙承恩又看梁園花寢薪書上痛時弊
鵬鳥賦成悲日斜當時未識治安策宣室何勞問前席
漢家禮樂興百年身後時方用儒術武皇銳志追古先
待詔金馬非才賢使生當時偶未死致治三代良非難

我聞古人任黃青大器由來晚成就舉世皆知非漢文
惟我獨憐生不壽空山落日寒煙昏千年遺廟無復存
芝庭古井久不食寒泉一勺斟芳蓀我生已是千載後
老去惟知懶開口致身富貴須少年獨立乾坤重搔首

讀唐崖碑

昔年登稚穎好奇先達示我唐崖碑是時未識六書故
豈知中有千古悲蹉跎塵世逾半百鏡中白髮看成絲
劫灰壽宮向南紀葉舟夜泊清湘湄道傍巨石屹千尺

舟人指此為浯溪呼兒篝火徑登岸草樹蒙密無旁蹊
回舟終夜四五起仰視清漢聽晨雞遲明攀援陟巖岨
石磴仄足難階梯平生兩目久昏眊大字盈尺無由窺
粵從少小偶誦億口占夢想心追惟乃知天寶全盛日
宴安耽毒鍾菑華清十月車馬集漁陽一夕煙塵飛
馬嵬倉皇六軍發靈武偏側千官隨俯從人望計良是
不稟君命禮則非三綱蚤失開國日萬事寧論叔世時
翠華東還果天意白首西內非人為閹豎竟一竊國柄

北雞幾再鳴宮闈向非奸黨自魚肉禍患正恐無時衰
中興功名屬李郭致治政績慚臯夔藩鎮侵尋事倔强
朝廷姑息惟羈縻唐家由此訖不振百年禍亂基於斯
邇來涉世六百載當時舊物無一遺高崖峭壁亦消泐
大字深刻生癰胝古今幾人此游歷賦詠往往興歎咨
豫章歌詩明大義廬陵作賦推事機人情天理兩曲盡
嗟我欲詩難措辭江風東來飽帆腹舟人告我行路遲
攝衣登舟亟就枕回首百里浮烟霏古來變故亦何限

貽厥事業須良規周宣一去不可作三復常武車攻詩

題梨園小畫

君不聞昔年天寶全盛時梨園玉雪千萬枝君王夜入
月宮去後庭愁損千蛾眉銀橋閣道相連屬十二闌干
倚寒玉歸來不憶天上游獨記霓裳羽衣曲沉香燕坐
清夜長流蘇寶帶懸明璫一百五十寒食節三十六宮
明月香阿環睡足嬌無力夢繞巫山楚雲碧六花散作
晴雪飛落地瑤華曉無迹漁陽一夜飛邊塵六龍萬里

天西巡馬崑腸斷埋香玉蜀道天高空白雲東歸坐歎
年華暮遙夜漫漫誰與度梨園子弟生白頭滿眼新人
不如故爾來此恨六百年花開歲歲春風前乾坤舊事
逐流水畫圖却向人間傳丰幅齊紈渺蕭瑟拭眼春風
香霧濕當年畫史知幾人不為君王寫無逸

題梅溪卷

我昔雙溪溪上住手種梅花千萬樹門前流水橫小橋
屋後青山更無數醉來放舟溪上流青山處處隨行舟

十里春風落香雪一溪雲影如浮鷗年來作客向荆楚
夢中猶記來時路披圖不省是他鄉徑欲挈舟便歸去
溪光山色殊有情梅花夾路遙相迎南枝昨夜報春信
歸去花前看月明

送丹丘生兼簡金華士友

吾聞赤城之東丹穴山上有珠樹青琅玕蒼麟白鹿共
馴擾翩翩五彩停鳳鸞瀛洲圓嶠在咫尺瑤臺銀闕青
雲間爾來人世竟寥絕青鳥久不來塵寰前年衡岳竹

多實鳳雛飛來栖石壇朱陵洞深海雲濕華蓋風高秋
月寒三閭廟古江蘿碧二女祠荒湘竹斑頗聞蓬萊水
清淺刷羽夜渡滄江灣滄江東望接雲海霞城石壁高
嶺屹赤泉出穴味如醴瑶草青青冬亦蕃九苞綵羽久
相遲碧梧翠竹交檀藥東歸幸謝赤松子千歲玄裳當
復還

贈丹崖隱者

吾聞零陵東有丹崖山青天削出青孱顏丹梯百丈不

可到仙人煉藥巢其間丹成仙去已千載至今草木餘
清寒我來覽古訪陳迹石磴仄足難躋攀上有撐雲柱
日之喬松下有懸崖噴壑之驚湍幽林野鳥作人語陰
洞或有蛟龍蟠何人結屋倚蒼翠抱琴林下聽潺湲乃
是丹崖仙人老孫子少年早脫名利闕祇今五十如處
子雙鬢鴉黑顏渥丹門前種秫釀春酒屋後黃獨供朝
餐野獷有時來獻果木客賦詩常往還留我石上煮春
茗松花落地雲斑斑我家金華五千里失身作客天南

端徵書昨夜趣歸興葉舟徑下湘江灘弘文館深難置
足神武門高宜掛冠山中草屋幸無恙拂衣歸共浮雲
間明年花開倘相憶把酒北望興長嘆裁書欲寄無鴈
過少待遼鶴東飛還

水車行

永州水車不假人力分送諸溝可以
及遠數里之外其田亦仰此水云

零陵水車風作輪緣江夜響盤空雲輪盤團團徑三丈
水聲却在風輪上大江日夜東北流高岸低岸開深溝
輪盤引水入溝去分送高田種禾黍盤盤自轉不用人

年年祇用修車輪往年比屋搜軍伍全家載下西涼府
十家無有三家存水車卧地多作薪荒田無人復愁旱
極目黃茆接長坂年來兒長成丁夫旋開荒田納官租
官租不闕足家食家食復藉水車力一車之力食十家
十家不憚勤修車但願人常在家車在軸不愁禾黍秋
不熟

荒田行

永州四野荒田彌望入
全州境即無曠土矣

永州荒田多宿草永州田多人苦少南村田荒無人耕

北村草深人不行往年峒徭據城壁驅迫編戶充軍役
十戶迄今無一存當時寧望長兒孫壯者隨軍入軍伍
老者盡作泉下土少者僅存雖長成十家九戶惟車丁
應當門戶倦奔走豈有餘力到農畝荒田積草如人長
熟田近年亦拋荒男啼女號飯不足草根木實常充腹
荒田幸免官徵科熟田徵科真奈何永民自嘆生來苦
不信人間有樂土君不見隔岸即是全州山四時畊墾
無時閒

漁蕩行

永州江清稀見魚永民歲歲輸魚租當年差官開湖蕩
尺水從茲起波浪江濱湖岸多沙洲一望不見天盡頭
常時風色黃塵起一夜雨聲黃潦流丈量繩引計頃畝
半抑編氓強分受黃綾大冊書入官歲歲催糧煩甲首
大家有田無宿春小家寄食身為傭年年逋負遭箠楚
儉歲惟聞

關

舟載糧輸入倉倉倉歲額常虧糧

君不聞道州魚課年年足當年聞課官不酷

永州魚糧
畝一斗道

金史卷之三
州纔數升又無水泊
之患民至今賴之

卷三

五言近體

江行

客路四千里江行兩月程
乾坤雙鬢改身世一舟輕事
業慙先達聲名畏後生
少年容易過寥落壯心驚

七言

丙辰立春日留錢塘

鶴書歲晚下岩扁
千里迢迢去上京
春事又從今日始

月華猶是故鄉明
愁來無復聞雞舞
酒醒生憎聽鴈聲
獨喜歸心似潮水
夜來又過富陽城

江上雨晴曉望

老去情懷厭雨聲
蓬窗曉起坐新晴
雲間一鶴從天下
江上羣山照眼明
身世悠悠渾是夢
客鄉事事總關情
白頭竟為徵書起
深愧當年魯兩生

觀盡忠池拜余忠宣公墓

荒池斜日暝雲陰
獨立空山淚滿襟
遺老能言當日事

寒泉猶照死時心
百年妻子皆魚腹
一代山河竟陸沉
故國春風又芳草
祇應遺恨九原深

過黃州

楚天雲淡雨初收
江上南風五月秋
勝槩幾年懷赤壁
宦遊今日過黃州
乾坤故物青山在
歲月無情逝水流
白首此身千里外
登臨不盡古今愁

登黃鶴樓

城上高樓接翠微
樓前山水淨朝暉
青山萬古應常在

黃鶴千年未一歸
兵火淒涼悲燐集
雲霄突兀又鸞飛
登臨不用重嗟感
城郭人民幾是非

登岳陽樓

片帆西泝大江流
五月南風過岳州
吳楚尋常多巨浸
東南形勝有斯樓
百年共老人間世
一代誰先天下憂
顧我登高尚能賦
不堪重起望鄉愁

寄武昌吳廣文二首

大江東下鄂州城
千里頻頻遠寄聲
壯志每憐人易老

其鄉猶喜月同明雲萍半世偶相遇膠漆十年無此情
聞道歸來黃鶴語五湖曾許白鷗盟

承風艤棹楚王城曾向蕭齊聽雨聲臨水忽驚頭併白
看山誤喜眼猶明愁來無復軒裳夢老去難忘兒女情
長憶故園春事動石田茅屋要尋盟

次前韻簡衡陽王俊華廣文一首

八詠樓前婺女城一年不聽早鶯聲登樓誤喜青山在
曉鏡羞添白髮明故園春風頻入夢異鄉啼鳥最關情

愁來更憶王文學何日東歸共結盟

寄漢陽陳廣文

水西門外西州路猶記津亭折柳枝
鴻鴈一年無尺素
江湖兩鬢各秋絲
三湘地控巴人國
八詠樓連婺女祠
聞道日來頻在告
莫因鄉土重懷思

次前韻寄王廣文

一冬不見衡陽使
開遍梅花到北枝
照眼山雲晴冉冉
捲簾江雨曉絲絲
青風落日三閭廟
翠竹何年二女祠

早晚湘江春暖好憑雙鯉寄相思

次前韻寄長沙李叔南

孤舟一別李徵士飽聽三湘哥竹枝
太白莫空尊裏月還丹難黑鏡中絲
素王禮殿崇新構赤帝行宮有舊祠
想見登臨足佳製綠毫日日寫幽思

寄襄陽李仲訓廣文

劉郎新自渚宮還每說襄陽李謫仙
夜月醉傾千日酒春風爛寫五雲牋
習家池上閒調馬漢女江邊誤喚船

白首何由一傾蓋暮雲春樹思年年

送楊明府從軍廣西

蚤歲棘闈曾射策轅門老去却談兵
烏紗有恨黃塵滿青鏡無情白髮生
半世春風蕉鹿夢孤舟暮雨竹雞聲
家山萬里天西北猶喜長空共月明

送張僉憲從軍柳州

千古清風柳柳州謫官誰復得清游
十年事業邯鄲枕半世風波舴艋舟
鸞鳳有時棲枳棘貂蟬自昔出兜鍪

白頭且遂從軍樂一任東陵說故侯

送人還武昌

湘口驛前江水流故人亭下送行舟
五更山月不知曉一夏江風渾似秋
無事取琴彈越調有時把酒看吳鉤
片帆我亦東歸去早晚相期黃鶴樓

謝王雪舟惠楮衾

楮生家住剡溪濱每念無氈鄭廣文
月夜久諳塵榻冷春風今向雪舟分
玉堂天上無清夢茅屋山中有白雲

見說梅花消息近，好將心事問東君。

次前韻述懷

倦客南游湘水濱，故山猿鶴久移文。
半簪華髮催年暮，一榻青氊坐夜分。
季子已無衣卒歲，相如徒有賦凌雲。
昨宵又作還家夢，茅屋分明見少君。

對月有懷

投老山林種秫田，春風吹上楚江船。
鄉關一別四千里，京國遙瞻尺五天。
宗武日來稀有字，廣文客久更無氊。

多情賴是湘江月照我清光似舊年

竹軒

聞道君家軒子好高情更借竹為名
開門蒼雪灑衣濕當畫青雲滿眼生
林下四時無日色枕邊六月有秋聲
丁寧慎勿開三徑更有蕭蕭車馬鳴

丁巳生旦有感

獻歲高堂奉壽卮白頭兩度客天涯
百年父母劬勞日一歲乾坤交泰時
故國音書歸鴈寄異鄉心事落梅知

斗杓又復回東北江水歸心日夜馳

題松庵

余伯恭江西人以醫寓居清湘

余氏安居如斗大長松繞屋四時青雲根有時孕琥珀
露氣滿山藏伏苓鶴踏仙花枝上落風傳天籟夢中聽
清宵借我蒲團坐來讀黃庭內景經

九日泊安慶城下危廣文餉酒走筆奉謝

舒州城頭山可憐舒州城下水如烟一年客路又重九
咫尺鄉山猶二千青眼故人殊念我白衣送酒可如泉

金日臣集
卷三
定知後夜到京國兩地懷人江月圓

五言絕句

病起偶成

一病又十日春歸了不知開門見芳草不省是何時

題雲山小畫二首

不到家山久茅簷長薜蘿最怜春雨後幽徑白雲多
不踏鄉山路于今又幾年茅簷知不遠只在白雲邊

題萬桂秋聲詩集

露冷三秋月香清十里風都將春草夢吹入小山叢

七言

題翠竹紅梅

瑪瑙坡前雪未消小樓翠袖倚嬌嬌醉中不省看圖畫
行過西湖第六橋

題杏花白頭公小畫

曲江池上踏殘紅十載春風似夢中誤向花前聽啼鳥
不知身是白頭公

題畫古木

漢室掄材構建章
斧斤日日到山岡
誰知寂寞滄江上
猶有參天古木長

題秋江小畫

兩岸青山宿雨收
西風木落洞庭秋
若為得似游魚樂
只恐煙波有釣舟

題宋徽宗石榴高宗書韓昌黎詩

金風吹綻紫綃囊
零落宣和御墨香
猶喜稍頭風露少

南枝有子殿秋光

辭

王穆字辭

王生穆名厥父攸命長而加冠字以熙敬古人制字名
實相須一有弗稱豈不厚誣惟人之生匪敬曷存一身
主宰萬事未根穆之為義惟遠惟深外著乎貌内存乎
心本末交修表裏一致勉而弗怠聖賢可至在昔大聖
穆穆文王緝熙斯敬其道乃光吾儕小人唯恐失墜夙

興夜寐罔敢逸豫洞洞屬屬執玉奉盈戰戰兢兢臨淵
履冰如見大賓如承大祭念茲在茲終始弗替匪惟知
之行之實難匪惟行之繼之惟難想彼川流不舍晝夜
我月斯征我日斯邁勿謂敬止惟恐弗虔勿謂繼止惟
恐或愆朝斯夕斯克敬克繼曷以致之惟學為貴百爾
君子各究爾忱我作字辭式配心箴

永庠三子字辭

有序

子生三日父命以名既冠而友字之禮也古

者人之命名其別有五以民生為信以德命
為義以類命為象取於物為假取於父為類
義也永庠弟子員鄒生復秦生泰劉生升皆
以易卦命名其殆德命之類乎三子亦既冠
矣謁字於予因字復曰孟陽字泰曰志同升
曰允升復行厥義為之辭曰

民之初生知愚同類亦既有名盍思其義幼而弗學曰
未有知既冠而字如何弗思古之君子以義制名匪惟

名之實踐於行惟子之名本乎大易聖人垂訓循名責實復之為義惟陽始生字爾孟陽進德之亨天地相交其道為泰字爾志同終始罔悖地中生木進而上升信能積學乃克有成泰道尚同陽德無息升而不已胡學弗積百爾君子勉之敬之朝斯夕斯視我字辭

說

永庠三子字說

予攝教永庠之明年將復如京師弟子員唐政秦懋鄧

良請於予曰政等無侶僻在遠方未嘗聞大人君子之
餘論先生弗遠數千里幸不鄙夷而辱教之今先生遽
舍去政等弗獲擔簦負笈以承謦欬深懼荒陲舊業以
遺君子羞願賜一言而卒業焉予告之曰若亦知夫為
學之道乎夫學所以盡為入之道不假外求也詩不云
乎天生烝民有物有則民之秉彝好是懿德夫德者何
人所稟於天之良心也良心之發則為善政誠勉之弗
怠為學之道豈外是哉然人莫不有是心也而物欲蔽

之存焉者寡孟子所謂操則存舍則亡者也苟操之弗謹放而不求心且弗存而況於為學乎因字良曰秉彛字政曰以德字懋曰士勉俾之循名顧義而勉學焉庶不負斯名矣雖然名者實之賓也有其名而無其實君子弗與也子其勉焉思其名以踐其實庶可以為學矣三子皆淳謹有志乎學故予樂以是語之猶懼其或忘之也遂書以為三子字說

銘

拙齋銘

邃古之世民俗熙熙巢居穴處泊乎無為粵自結繩爰
逮書契風氣日開俗由以敝績素為絢雕質以文是非
雜揉真偽糾紛變故相凌譎詐相尚徐偃飾仁燕噲竊
讓漢陰抱甕桔槔見嗤亦有吳客善用不龜機心日萌
機械日盛射利抵巇以拙為病代有貞士究觀古初抱
朴行素以拙為徒日出而作日入而息我蠶我衣我田
我食人謂不足我則有餘人皆奔競我獨休居相彼世

間物有萬類倚伏相尋利害攸繫謂鳩為拙乃居鵲巢
蛛螫信巧一身莫逃惟人之生真固實偽抱拙終身庶
其無愧有扁昭揭勿替厥名朝斯夕斯視我斯銘

題跋

跋所翁龍

昔之善論畫者不于其形似視其筆意而已予嘗見古
人作畫規模畧是而趣度閒遠盖有出手筆墨畦徑之
外者後人徒泥其迹古意遂不可見此畫獨得古人筆

意信其為所翁作無疑夫龍之為物神變不測尤不可
以形迹拘而世謂張僧繇畫龍不欲點睛恐其飛去此
所謂論畫以形似見與兒童隣者可為一笑因閱此畫
遂識其末

尚綱齋集卷三

欽定四庫全書

尚絅齋集卷四

明 童翼 撰

雪川集

五言古詩

題凝清軒三首

高齋闢華館
列榭臨清渠
綠莎被文砌
長楊映綺疏
芳洲雜蘅杜
金塘擢芙蓉
澄波蕩彩鷁
弱藻栖文魚
良辰

啓華宴列坐徵名儒衣冠集觴詠歡歌謝室宇香清凝
綺席酒淥湛芳壺心賞自云逸日晏不知飭既醉歌太
平桑扈詠樂胥逍遙寓宇內不樂復何如

其二 效陶靖節

少無簪組念雅志在丘岑結廬古澗阿棲迹嘉樹林南
軒納朝陽北牖延夕陰踵門無深轍入室有鳴琴良朋
以時至清坐談古今秣田秋向熟濁醪行可斟傾筐擷
園蔬持竿釣清潄歡飲聊共適過滿非所欽

其三

效韋蘇州

高軒臨曲澗長夏有餘清
微風灑然至林木起秋聲
焚香坐清晝素心澹無營
幸微軒冕累庶免憂患嬰
於陵樂灌園沮溺志耦耕
晤言聊自適誰謂薄浮榮

清芬室

幽人抱高尚結屋城南坳
琴書有餘暇山林無俗情
春蘭被後圃秋鞠麗前榮
幽香適何來微風相與清
竟日澹相對不為塵慮嬰
逍遙一室內庶以全吾生

贈別

古人重送別送別惟贈言今人亦送別送別重華筵華筵亦何有水陸具饌鮮燕歌逐趙舞齊管間吳絃豈無一日歡顧為千日憐不如贈言好情意罄所宣上言保忠孝竹帛千古傳下言加餐飯相期黃髮年黃髮不易致青年當勉旃贈言良不多持此白圭篇

送人之安慶

皖城在何許乃在楚江湄客行良亦勤王事有程期揚

艫出江浦挂席指中坻簡書豈不勞山水多清暉公餘
肆遐矚退食常委蛇功名分所有冰蘖慎自持加餐何
足道願子崇令儀

寄永庠士友

弱齡抱高尚遯跡栖丘園胡為負鉛槧遠涉湘水源山
水豈不佳風氣良亦淳况有二三子晨夕共討論寒暑
未云易迢遙下吳門尺書昨夜至眷眷道殷勤矯首天
一方永念懷故人江水日東流無緣復西奔惟應北風

起目送南飛雲

雲林書舍

效陶靖節

少微軒冕累雅志在林垞讀書三十年乃為塵事嬰束
裝去京國遙遙抵南荆疾風吹單轡五月淩洞庭東還
豈不樂尚阻千里程永懷園田蕪歲月忽屢更披圖觀
斯境依依念平生雲山諒悠邈緬焉起深情

送人入京

效陰常侍

送客上京國弭節向春江山花為舞女江水當離觴單

鱸逾鳥疾疊浪似人忙明發東華路足踏軟塵香

種德堂

種竹期作林種松望成陰種德何所期乃在方寸心勿
謂寸心小生意無古今勿謂萌蘖微拱把可十尋柯葉
日以茂根本日以深尚慮斧斤伐莫使牛羊侵我歌聊
自儆持用此心箴

友竹軒

伐木久輟響谷風遂成詩友道已不古况復叔世時耳

餘亦構隙寄祿良可知君看友竹軒為事豈好奇擇交
逮草木此意誠足悲管鮑不可作吾將誰與歸

如在堂

奉親有高堂堂無百歲親思親有孝子子無百年身親
去日已遠我心諒如存入室想音容誓效如有聞豈惟
嚴烝嘗甘旨方具陳皦皦心目間膝下奉晨昏我身良
有盡我心浩無垠百年豈不長子後亦有孫所愧為人
子莫報罔極恩載歌蓼莪篇此恨終乾坤

蘭雪軒

倚倚謝庭蘭玉立美無度託根已得所况復依瓊樹天
寒霜雪繁祇恐歲年暮春風不披拂何由覲情素所願
晞春陽時時承湛露

並蒂二色菊

秋林已凋謝晚菊忽獻奇熒熒霜中英一幹各異姿初
疑金玉蝶駢棲瑤樹枝又疑道家術變幻之所為我聞
菊稟性真正恒自持胡為遂世暮革面非所希容色信

可易本根諒難移所以古君子堅白無磷緇草木非所
憐永為時世悲

次張來儀題金華山居圖韻

我昔采玄芝東上金盆山仙人五雲車可望不可攀授
我日月鼎粲然鉛汞斑持歸石室中神光燭茅管自從
落城府歲運亦已還頗聞青田鶴近自遼海還口銜五
色圖飛下青冥間山中舊茅屋言歸老雲關丹液庶有
成白首回童顏

送王鎮撫

將軍官隴西家住東海頭隴水豈不長不入東海流將
軍歸東海葵親海上洲獨有隴頭月相隨歸故丘隴月
行復圓王事不可留再聽隴水鳴思親恨悠悠矯首海
上雲只向天南浮願學海雲飛莫學隴水流

七言

送馬明府還蜀

蜀道易昔如上青天今如履平地借問昔難今易之所

由劒閣挿天狻猊愁水行復有鼉鼉憂大明日月照九州
山無險道江安流陸走秦鳳輦馬牛水下江漢無停舟
蠻夷九譯職貢修東踰瀼貊西渠搜馬卿家住錦水頭
少年把酒看吳鉤祇今五十雙鬢秋萬里作官江海隅
三年宰邑政理優桑麻接畛民歌謳問渠何事懷故丘
春雨霜露悲松楸人生百年水上漚老我白髮思歸休
前年東下岳陽樓冷官自可歸田疇苦溪又作三載留
橋首先龍雲悠悠今年赴闕覲冕旒承恩幸復來滄

洲石田茅屋山之幽一身湖海雲萍浮嗟君素志亦已
酬太平歸鄉復何求歸故鄉守桑梓蜀道昔難今孔易
千村萬落無荆杞但願千萬年薄海內外無遠邇遺民
在在安田里太平有象自今始

送劉簿歸雲中

陰山六月天雨霜大磧草白塞雲黃邊民肉食無稻粱
追逐水草隨牛羊劉郎家居古定襄少年走馬臨戰場
上功模府羞戎行束書甘作薇省郎將命專對行四方

竭來佐邑東海傍幡然掛冠歸故鄉北風吹沙鴻鴈翔
黃河十月冰無梁問君遠行奚所望關河酒綠蒲萄香
臂鷹走犬獵近岡歸來馬上懸兩狼後車捆載兔與獐
割鮮行酒據胡床酒酣耳熱起徬徨少年此樂無時忘
方今四夷盡來王塞上有土皆畊桑五風十雨時歲康
歸去歡樂殊未央人生百年誰短長鏡中贏得雙鬢蒼
君今已謝名利韁笑我未識閒中忙冷官十年坐寒牕
吾伊五夜聲琅琅三徑松菊日就荒把酒送君增慨慷

仰視雲漢何茫茫明年詣闕上封章聖恩若許歸滄浪
白首擊壤歌虞唐

題廬山圖為潯陽張子善賦

我昔放舟下江水拭眼廬山如畫裏披圖一別又十年
却望雲山隔千里雲山於人殊有情開帆秀色遙相迎
當時山靈不解事不邀我向山中行別來見山每相憶
咫尺黃塵不相識三生宿緣知未盡又向君家看山色
留侯子孫雪滿顛結茆正近廬山前山中采藥今幾年

金史曰卷之三
卷四
翩翩兩袖生雲煙我家金華好煙嶂赤松牧羊在其上
知君有意相從遊蚤晚支筇一相訪

題松陰卷送杜幕長

杜郎家住淮水東早年學種徂徠松讀書牕前愛松綠
日夜望松高過屋蕭條兵火二十年有夢不到家山前
長林大谷化荊棘蒼松久作爨下煙竭來之官向吳會
松樹童童偃華蓋官曹白日困簿書客邸清宵聽字籟
故園三徑久已荒東鄰西舍渾相忘昔時遺老無一在

頽垣碧草如人長三年坐嘯長松下神武門高冠好掛
買舟載取明月歸更寫蒼松入圖畫人生出處非偶然
問君宦游今幾年青雲得志自可樂白頭歸鄉也不惡

莫士元山水歌

吳興畫手古所傳近代復數莫士元莫郎畫山惟畫意
不學吳人金碧繁前年為我寫岑寂落筆悲風動蕭瑟
不知渾沌開何年絕壁猶含太古色兩株古木蒼蘚皮
煙雲繆轡迴風吹廣樂秋張洞庭野鐵網夜起珊瑚枝

林下古木荒茅茨綠蘿交絡簷間垂抱琴來訪者誰子
路險不畏溪橋危顛崖石磴何逶迤仙人往往凌丹梯
九疑衡岳儼在目復恐有路通仇池我家金華山色裏
見畫忽憶山中時明年春雨瑶草綠荷鍾歸採南山芝

莫士元畫

天下幾人畫古松近代獨稱唐棣好莫郎棣也里中子
每見虬枝驚絕倒閉門一月生風雨敗壁頽垣恣揮掃
不知何年得神助意匠經營出天巧晴窗示我雙松圖

滿幅煙雲生縹緲高堂六月無炎蒸颯颯悲風起林杪
蛟龍欲雨動鱗甲虎豹挐空奮牙爪孤根盤盤踞厚地
高標落落撐晴昊嘆息徂徠久荆棘何處丘原存合抱
客邊忽遇許玄度要我林泉共幽討君家弁山古雲麓
歲歲畊雲種碧草松根茯苓如斗大便擬服食思輕矯
只恐明堂須棟梁長材未許山林老

閻仲彬山水歌

總章右相之子孫丹青名家今尚存老來寓隱吳市門

白頭未覺兩眼昏
荆闕范郭久擅場
彬也醉來下筆親
吳興作者何紛紛
眼中忽復見此人
高堂雪壁垂繡素
白日蒼茫起煙霧
長林大谷少人行
海闊天低風景暮
蓬萊圓嶠不可到
咫尺仙凡隔歸路
丹崖瀑布懸秋旻
入耳颯颯悲風度
重岡復嶺雲氣連
陰洞或有蛟龍眠
人間霖雨不易至
便欲辟穀求神仙
丈人偶立秋風前
悵望落日心悠然
明朝拂衣下衡霍
采芝共入高山煙

題趙麟春郊散牧圖

古人畫馬稱曹韓近代獨數趙集賢一往不可得筆法
付與諸生傳天閑駉牝踰萬乘神定揮毫覺天勝人間
羈勒不敢施散牧春郊見真性一足膝坐雙足拳一足
噴吐噓青煙就中一足倚樹立雄心已馳青海邊雪峯
上人今支遁不惜千金愛神駿客牕留我展畫圖復見
開元閼清峻祇今驂騑世豈無虞坂往往逢鹽車何如
駕駘立仗下日飫太官三品芻

題筆工溫國寶詩卷

古筆以竹資簡牘椎朴遲鈍古所服後人製穎乃神速
工巧有餘拙不足書契而下篆籀續魯壁汲冢光煜煜
張鍾嗣興尚圓熟妙用允屬中山族吳興作者首馮陸
溫氏父子踵其躅翰林雄文聯巨軸重之不啻連城玉
紛紛末工事角逐文犀象管炫凡目吁嗟溫生老而禿
世無具眼甘退伏百金不售久韞櫝安得一用古制復
嗚呼安得一用古制復書契載覩義皇俗

題張來儀青山白雲圖

天下幾人畫董元近代獨數高房山房山不獨妙形似
輔以丹碧增其妍往年未識廬山面曾向房山畫中見
高堂白日生雲煙分明生我南康縣大山峩峩倚天立
倒捲銀河瀉空碧山山起伏爭坡陀海濤出沒晴雲多
醉酣老眼重摩挲此身便欲栖煙蘿十年一夢隔雲海
却向長江聞擢歌青山於人如舊識滿眼黃塵非故國
羞將白髮照滄浪咫尺家山歸未得先生舊業廬山前
丹青蚤得房山傳還能作畫遠相寄白頭共賦歸來篇

題王生瞻雲圖

王郎家住越水東讀書養母越山中一朝薦書上藩府
捧檄又逐西征鴻去年將命來雪水日日思親春雲起
今年重到雪水頭看雲思親雙淚流自言少小失所怙
鞠育恩深賴慈母母兮孝養猶有時父兮一別終天悲
當年兵塵暗廣路大母年高髮垂素山中一月食無魚
日夕臨流心獨苦跣足弗憚百里遙六月火雲天宇高
鮮鱗深甕貯江水賴肩赤日行蓬蒿中途潦水深莫涉

咫尺蒼茫失舟楫解衣抱甕身與俱甕沉鱗躍身為魚
天高茫茫誰與訴此水終年有人渡我聞此語心孔悲
天道幽遠諒有知君不聞姜孝子舍側雙魚出江水又
不聞王休徵天寒解衣魚出冰當時傳信書太史至今
孝感人間稱百年幾人稱孝子九原有知猶不死古來
上壽無百年紛紛泯沒誰與傳王郎有父亦有母母今
白頭稱節婦一門孝節世所無教子復有瞻雲圖我作
歌詩徵不誣他日太史春秋書

題望雲卷

他鄉見白雲故鄉有慈親慈親白首隔鄉縣白雲日日
他鄉見雲飛有時還故山遊子為客何時還我願游子
心相隨白雲去莫學白雲飛只共白雲住白雲住止吾
親舍遊子晨昏居膝下坐令天下思親人歸去家山看
白雲裁雲作春衣釀雲作春酒舉酒勸慈親願親千萬
壽從今相期黃髮年子母人間永相守

題江天雪景卷

海風吹濤作山立遙天萬里雲一色天人薄暮剪飛花
半夜寒光動窓白山人睡起僵欲扶摩挲醉眠猶模糊
推窓不知人在世拭眼一觀天地初乾坤渾沌含太素
溟海茫茫隔煙霧霓羽蓋紛相迎咫尺蓬萊有歸路
仙人鶴髮顏如童翱翔貝闕遊珠宮萬年瑤草凌寒碧
千歲蟠桃如日紅瓊林玉樹交相倚白鹿軒騰素鸞峙
織雲不動天無聲一色瓊田三萬里六龍海上飛金烏
鷗雞明嘶鳴天衢剛風吹夢落人世却向蓬窗看畫圖

黃金未就丹砂訣青鏡蕭蕭滿華髮從今更約三千年
歸去三山白銀闕

題蘇平仲詠梅花卷

我懷蘇子瞻白髮謫嶺南當時梅花有佳句至今清氣
遺江潭江南見耳孫氣貌殊不凡平生不識耕與蠶經
史六藝俱沉酣昔年橫經坐太學壁水浩蕩恩波涵高
堂忽念垂鶴髮丹陛一夕辭朝簪歸來結屋依蒼巖白
日對客惟清談我家茅屋深烟嵐門前綠樹垂黃柑微

書一夕下巖穴長江萬里隨風帆雲根黃獨如斗大十年無夢攜長鏡讀君新詩如夢覺令我一唱嘆者三逋仙舊居偶一過夜雨蒼苔荒石龕南枝久已化荆棘縞衣無復來耗耗我方東書上京國百拙自嘆無一堪長途兩脚倦行役黃塵撲面羞青衫明年儻遂歸田約白首相見期無慚

次張來儀金華山居圖韻

我昔好山未識山趺足日日勞躋攀歸來小樓坐清晝

佳處政在阿堵間蓬萊岱嶽豈不好挂帆入海經東蠻
崑崙靈鷲亦良遠流沙萬里經玉閭不如故園攬奇秀
南北兩峯開髻鬟半生足跡不出境詎意天道如循環
白頭南行近萬里壯心未

闕

官舡柁樓高於屋

長江利涉無險艱篷窗日日看山色脫畧塵鞅遺世患
眼中臺殿盡荊棘巖岫無復金碧殿匡廬衡岳不可識
殘碑斷碣弃草菅江山無情亦銷歇豈有大藥能駐顏
孤舟歸來豈天意山泉尚許聽潺湲何物微官苦維繫

幅巾行逐孤雲還煩君寫圖懃岑寂卧游償我平生閒
石渠天祿無夢到姓名久在丹臺班

遊道場山追和東坡先生詩韻

具區西南古雲麓聞有於菟嘯林谷何年天竺道人來
結茅晏坐蒼山足雨花散落春漫漫四時香靄煙雲盤
浮屠千尺倚晴漢方池六月鳴驚湍山僧閉門長不出
白日跣趺惟文席清涼境界無業緣菩提善根由宿植
洞庭龍女青雲鬟常時獻果來山間蓬萊方丈在人世

安用入海求神山人間昏夜何時旦却望雲林在天半
少年學道今白頭搔首東風一長嘆

登道場山雲峯追和東坡先生遊徑山詩韻

十年不見金華山歲月閱人如逝川孤

闕

五千里

復與山水相周旋竭來吳會浮

闕

庭下瞰神龍淵

道場秀色接朝暮有足未上高峰巔荒山五夜殷燐火
寶地一夕開青蓮浮屠突兀倚天半石磴百折何蜿蜒
未將足力供眼界癡坐且學山僧禪豈無籃輿捷飛步

亦有杖頭沽酒錢勞人本欲息四體何如一醉山中眠
今晨登覽頗自適得意仰羨雲中鶴勞生字內已頭白
百年幾受憂患煎平生兩足厭奔走瘦筇獨許登山便
同行況有二三子忽到絕頂心悠然蓬萊東望又清淺
一笑回首三十年

贈翠峯上人

方壺仙人古詞伯千里聞風未曾識奇書名畫數相遺
兵塵不一見顏色雲山望斷今已仙他生相見應千年

翠峯上人遠相過下筆似得壺公傳高齋反闕無俗客
日對雲林寫蕭瑟丹青脫畧兒女姿篆籀橫陳古人蹟
古來草聖曾幾人近代獨數張藏真藏真一往不可得
吾師醉來下筆親高堂雲壁照人目運肘揮毫風雨速
青天雲霧生晦冥白日龍蛇起平陸枯藤老樹懸蒼煙
珊瑚玉玦相鈎連郟鄏九鼎出泗水支祈鐵鎖淪重淵
世人貴耳恒賤目奇寶往往弃道側虞公未信百里奚
燕市自售千金骨半生湖海西復東春如社燕秋如鴻

地肺山前踏蘿月天目嶺上眠松風十年鄉國不相見
白首他鄉初會面形容未識聞語音知是山人共鄉縣
握手訪舊心為驚舊交落落如晨星相知少年盡頭白
却話故山雙眼青老我思歸歸未得咫尺江濤隔吳越
憑君為我圖家山早晚東歸看山色

蜀泥行

吳興河高田下雨林水蕩岸日低薄每歲農民蜀取河泥澆岸然不能高也蜀

音覽吳人

讀作佩音

蜀泥暮蜀泥河水繞田河岸低吳中有田多瀟鳥河

水高於田數尺雨淋浪拍岸善崩歲歲壘泥增岸塍載
泥船小水易入船頭踏船船尾立吳兒使竹勝使篙竹
筐漉泥如濁膠水流泥滑僅沃焦岸上浮土何時高此
身便作淘河鳥河水終多河泥少君不聞越上之田高
於城連車引水千尺坑車聲軋軋夜達明田間濁水無
時盈吳田苦勞越苦旱越水常慳吳水滿嗟手世間至
平惟水猶不平請君不用觀世情

修園行

仙書作竹園書五
竹字疑當作園

吳田膏腴畝壹鍾吳地有米皆宿春吳人畏水不畏旱
只愁圍滿田水滿家家護圍如護牆老少鬲泥河水傍
前年差夫運官木半歲風飡并水宿去年處處捉逃軍
白日家家深閉門兩年無力修圍岸河水入田天不管
今年官令催修圍河深鬲泥泥亦無岸傍在處無剩土
撐船遠向南山取大圍浩渺如望洋小圍不啻千畝強
田家船小無十斛低岸長圍何日足朝輸百船防罅漏
暮輸百船防水口船去船來來去頻岸上何曾土加厚

問君園岸何當成請君少待南山平

燕銜泥

燕銜泥年年飛向畫梁栖燕足猶懸舊時縷華屋年年
換新主去年人作陌上塵今人不見去年春海棠花開
春雨歇綠窻半掩珠簾揭十二闌干春晝遲美人沉醉
鶯聲咽繁華一夢隨飛煙燕子歸來如舊年昨日花開
今日落得意春風且行樂花開花落年年春行樂年年
非舊人却羨茅簷舊時燕主人歲歲長相見

五言近體

赴京遇雨留客邸次公叙韻

積雨青燈暗羈人白髮生愁知清夜永老覺黑貂輕賓
館悲長缺泥塗畏遠程故山茅屋好漂泊愧浮名

七言近體

丁巳晦日立春

前年孤擢泊錢塘去歲三湘送鴈行萬里歸來猶是客
一身強健即為鄉土牛鞭裏春先到野馬塵中日又長

獨喜故園茅屋在小山松桂未全荒

戊午生旦次丁巳生旦詩韻

去歲三湘把酒卮洞庭煙浪渺無涯雲山易地懷鄉國
風木終天感歲時客裏交情貧獨在鏡中勲業鬢先知
半生舊學皆荒落只有歸心不外馳

承召入京朝退偶成

陋儒華髮入金門也向彤廷預討論朝退每陪賢俊後
詩成曾感帝王尊九重親為書宸翰多士人均仰聖恩

共羨太平千載遇自嗟無力報乾坤

早朝遇雨次公敘韻

閭闔晨開扇影分風飄仙樂靜中聞九天雨露垂恩澤
五色旌旗絢彩雲犀象效賔來絕域衣冠賜宴總元勲
陋儒擬筆圖王會昭代于今政用文

送人之京

澤國深秋江雨晴郎官報政上神京金陵東望三山遠
震澤西風幾日程雙闕曉瞻鵲觀五雲天近鳳凰城

金史四
卷四
定知朝罷承殊渥
錫宴南宮預寵榮

送郡守入覲

陌頭官柳綠依依
三月春風上帝畿
京口帆移雙闕近
鍾山日上五雲飛
天開閭闔瞻龍袞
樂奏簫韶有鳳儀
想見在廷稱治最
歸來五馬足光輝

郡府公讌次太守韻二首

江郊曉日迎丹詔
一札綸音四海傳
聖主九重親制作
儒臣千里任承宣
文章喜見隆三代
京國遙瞻尺五天

尚憶彤廷曾錫宴衣冠濟濟扶初筵

其二

昔年承召趨京國曾聽東華曉漏傳
廊廟夔龍新黼黻藩垣方虎舊旬宣
朝回青瑣依丹地酒賜黃封下九天
此日江城迎鳳詔白頭猶得預華筵

次郡守遊山詩韻

一年忽忽春將暮下馬山亭暫解鞍
晴日撲簾花氣暖晚風迎路麥秋寒
青林佛寺明金刹白壁人家近翠巒

知是公餘來問俗不因游行事追歡

贈風鑒田生二首

湖上春風生綠波扣門有客遠相過開窓共愛青山好
臨水方憐白髮多勲業鏡中還自笑聲名身後定如何
雲間黃獨行堪斲歸去茅簷隱薜蘿

少年功業已無心况復蕭蕭雪滿簪蔡澤生平空自許
杜陵老去即長吟煙中草色孤村晚雨後松花一徑深
正憶家山無限好隔林何處語幽禽

贈醫者

新築茅堂霑水湄，喜無車馬到柴扉。
雨荒苔巷夫須合，日上芸窗脉望飛。
丹室夜寒珠有暈，華池春暖玉生肥。

不須更學壺公隱，恐有文光動少微。

夫須，少微，有臺，註脉望者，何

諷書中得一髮捲視四寸許如環而無端用力絕之兩
頭滴水方士曰此脉望也蠹魚三食神仙字則化為此
見雜

移竹次以貞韻兼懷湘中士友

泮水秋風吹鶴髮，江湖夜雨憶魚竿。
客鄉賴有書聲好，

官舍新添竹色寒粉節飄香浮綠蟻錦箋題字寄青鸞
美人遠隔瀟湘浦日暮碧雲天外看

題翠微吟藁

幽人結屋翠微裏日日哦詩面碧岑嵐氣曉侵書帙潤
煙光暖入硯池深千金白壁無輕售三嘆朱絃有賞音
珍重錦囊須什襲莫將聲價動雞林

題清隱草堂

在城中舊署
二水會處

沈氏草堂何所有開門惟見白鷗波樓臺上下通雲氣

城郭中間聽樵歌一夏軒窓秋意早四時闌檻月明多
喜無車馬紅塵客時有高人載酒過

題松風閣

若耶溪上毗盧閣萬箇長松繞屋青半空雨歇龍吟曉
午夜風生鶴夢醒孤舟八月過彭蠡廣樂何年張洞庭
我亦平生識天籟抱琴來就月中聽

題黃龍洞

湖州城北山如畫聞有黃龍宅上頭六月林巒常帶雨

卷四
四時風物總成秋雲根下伏千年洞巖竇中藏百丈湫
昭代于今崇秩祀只將明德答神休

題廣陵太守歸葬卷

戎馬驅馳歲月遷南柯一夢竟遊仙
丁年有恨違鄉國丙舍猶憐有墓田
幾處丘原存馬鬣誰家珪組尚蟬聯
披圖不用重嗟感金粟荒岡澹暮煙

觀東坡先生和胡完夫詩卷因次其韻

完夫名宗愈常

承恩出守鬚毛班趣召遙歸虎豹闕閭闔九重天帝所
蓬萊方丈道家山一時文物隆三代百世才華重兩間
獨怪買田陽羨約清朝何事也求閒

五言近體

題小畫四首

秋水陸蓮房幽禽語夕陽故園歸未得飛夢繞林塘
落日湖光淨芳洲野蓼紅幽禽如有意獨立向秋風
野水帶平沙叢篁映白花鳥啼人不見春盡客思家

竹外幽花白山禽立晚風行人莫回首不是故園中

題扇面小景二首

前山新雨過碧樹晚風寒可惜清秋景無人共倚闌

雲山

澗底雲根濕林梢風葉鳴何時明月夜來此聽秋聲

木石

題江村片雨圖

斜日江村外蒼茫片雨秋披圖忽相憶曾上岳陽樓

題子昂學士所書詩後

香奩佳句好知是舊王孫留得風流在生綃見墨痕

息齋風竹

夜久商飈起蕭蕭山月明小窗雲影亂無處覓秋聲

次張來儀金華山居圖韻

聞說山中路經年斷客行山人理歸屐莫遣綠苔生

題鉤勒夾竹梅

美人隔秋水贈我金錯刀願因青鳥使報之應瓊瑤

銘

手植檜杖銘

質之堅聖澤存制之模謝丹腹危能安持永年

靈壽杖銘

杖之靈危弗傾杖之壽持永久錫斯銘予汝銘

劬生堂銘

維天生民不能自生託體父母具人之形粵自提孩煦
嫗食息訓我迪我迨于成立日月逾邁孝養弗時風木
興感夢莪纏悲炯炯音容儼在心目永言孝思惟日不
足親去日遠我心弗忘我心之存我親在堂永念劬勞

昊天罔極豈不百年痛猶一日奕奕高堂陟降在茲百
爾孫子永言孝思永言孝思以引弗替我作銘詩永錫爾類

芸軒銘

有序

盈天地間惟萬物物之類有善惡故人之類
亦有君子有小人使皆小人焉而無君子以
治之則善類或幾乎熄矣惟物亦然故物之
惡者斯有善者勝之是以蛇虺惡物也而雄
黃足以禦之烏附毒藥也而蒿草有以制之

然非徒勝之也又致其用有以藥夫病焉則
夫君子之治小人也豈不足以俾之遷善改
過而適於用也哉吳興顧祐蚤從予學未及
卒業而仕奪其志其藏書之室曰芸軒弗忘
其舊習也不遠千里來請予銘予惟芸辟蠹
者也蟬之為蠹書之蠹也生既知有以辟之
矣則夫為心之蠹者其可不思所以辟之也
哉予故特為之銘俾之朝夕有所儆省云銘

曰

天地兩間物有萬類善惡既殊利害斯異各稟爾性各賦爾形胡不自靖利害相凌惟木之生惟蟻實蠹亦有蟬魚廼蠹綳素有鴛除蟻有芸辟蟬人惟物靈豈無厥心相彼世人厥蠹匪一耳蠹惟聲目蠹惟色口鼻四體臭味佚安惟心之蠹諒非一端曷以養心要在寡欲天理既明日用恒足心得其養百體具從推以治人曷止靖躬古之君子克自惕厲功加于時名垂後世士之為

學希聖希賢念茲在茲終日乾乾

傳

淳川漁者傳

淳川漁者鎮之藁城人也少留心問學屬海宇倣擾間
闕戎旅中踰二十年及四方底定為當道者推轂長萬
家邑時徵調繁急比邑長二率以事病免去漁者獨竭
心政理以畢集以故上官無譴呵焉尋得告歸鄉里遂
放浪山澤間所居去淳沱不數舍因自號曰淳川漁者

云人或疑焉漁者嘆曰是豈不足遂吾志乎始吾之少也亦有志當世矣暨得宰一邑謂可以少摠吾志然操刀未習而遽製錦幸獲免去為榮多矣今優游田里鼓櫂扣舷煙水間是豈有志於鉤餌乎哉昔愚嘗鄙世之漁者矣操網罟腰笭簞以涉不測之淵偶獲尋常之鱗則軒然喜固足厭其志矣彼曾未覩任公子之所獲也夫任公子所獲猶小者耳彼曾未聞嚴光之獲高致重名也然嚴光所獲亦未足多也彼猶未若呂尚之獲千

乘國也然吾之志弗在是也非特志弗在是也才誠有所不逮也故吾所以假名於是者非欲援古人以自高也亦將持竿引綸相逐漁人舟子以逍遙餘年也非吾所志也予聞而韙之惜其志之弗白也為之傳云

贊曰自昔逸人高士弗屑世故往往自詭於畊牧屠釣間若滄川漁者具有志於是乎非耶然呂尚嚴光不可尚已視彼屑屑世故以漁獵勢利於尋常間者亦何可勝道哉

題跋

跋時苗留犢畫卷

時苗留犢人槩稱其賢廉則近乎矯情干譽時苗之志
疑不出此也予切意其蓋為務農敦本而然觀者蓋於
意外求之

題張來儀楚江清曉圖

右楚江清曉圖尋陽張羽來儀為予作也予別瀟湘五
年每一念至雲山煙水瞭焉心目間因念結髮讀經書

志聖賢學其能不遺忘者鮮矣展玩之餘書以自警

跋王右軍十七帖墨本

右軍十七帖刻于唐貞觀而歷代法帖勒于宋淳化後
貞觀踰三百載其存者已鮮則貞觀所刻宜不多得也
此帖刻畫精好予平生僅一二見然是帖初傳豈止什
百而已哉由夫識馬者寡莫知愛重往往淪棄此蓋其
僅存者耳嗟夫豈特帖為然哉

又

予蚤歲閱晉唐諸帖其刻畫或未盡善輒棄去不取後
觀諸名家所藏善本與予向所見者蓋無大相遠然後
知向所棄者亦未易得也及得此本寶愛殊甚今三十
年而所見益鮮則知世間凡物求其全美固不可得也
嘗怪世之取士往往失於求備是以有遺才之嘆因論
此帖為之慨然

尚絅齋集卷四

欽定四庫全書

尚絅齋集卷五

明 童冀 撰

北遊集

五言古詩

過盧溝橋

夜度盧溝橋
隱隱聞寒更
居人久已寐
行子尚宵征
青天四垂幕
仰見北斗橫
石梁河界漢
闌下倚空明
朔風

淒以寒況乃霜露零我行豈不勞簡書嚴有程同行荷
戈卒萬里赴邊城我身弗遑恤念之感中情

題鄧伯言詩集

時雨滌煩暑焚香坐清晨開軒面山色有客過我門袖
銜珠玉篇高論懸河翻清辭及妙語往往與道隣嗟予
生苦晚弗獲窺道真詎意衰謝餘正始乃復聞古人不
可見古道良未湮俯仰三嘆息永言懷古人

題朱節婦詩卷

深州人

洛陽三月春風起吹落南園桃李紛紛飛逐馬蹄塵
不學芙蓉抱霜死張家女兒夫蚤亡間關戎馬隨姑嫜
當年紅顏若桃李即今白髮如秋霜百年世事隨流水
留得芳名照青史君不見東家桃李移西家年年歲歲
開春花

答衍公約看杏花

城南招提紅杏花春風歲歲開晴霞燕城自昔少春色
出門開眼惟風沙去年抱疾卧官舍聞道花開已花謝

東君不念客鄉愁十日春光不相借起來繞樹行嘆嗟
落紅滿地春日斜旋掇殘英真懷袖留得餘香歸淪茶
今年二月春光早花開更比年時好出門十日九愆期
復恐韶華閒過了一年春事寒食天節物驚心思少年
揚鞭載酒城東道繁華一夢隨飛煙即今老作他鄉客
每藉春光憫離索裁詩先為報花神莫教一夜東風惡

行師見和因再次韻

曲江昔年千樹花馬啼踏水翻明霞春風一夢生白髮

幅巾千里衝黃沙歲月閱人如傳舍過眼榮枯更代謝
百年歡樂能幾何一日清閒不相借醉來自笑還自嗟
挑燈坐待窗月斜明朝擬去看花約汲泉旋試蒙山茶
隣雞催人故鳴早起看樓頭天色好東家蹇驢許相借
惜負詩囊無便了人生行止本由天居然負約如去年
百年何時有暇日三月清明過禁煙老來羞作看花客
還擬持觴憫離索落紅一任滿蒼苔收拾煎酥也不惡

三次韻簡衍師

祇園何年天雨花春風雨樹栖丹霞蒼苔歲歲落紅滿
不數布地黃金沙上人西來住王舍過眼空花任開謝
兩年約我送春歸半榻白雲許相借新詩脫口猶出嗟
展卷坐玩山月斜一自鄉山別妻約十年不試趙州茶
客裏相逢恨不早道義相忘無醜好花前幾約共凭闌
身外多愁未能了黃塵世事相拘牽況我齒髮非壯年
流光催人劇奔雷病眼看花如隔煙人生未信長為客
早晚南還還離索迎門稚子笑牽衣此日老懷良不惡

海子橋大風即事一首

韓彥思王宗禮偕王足不良于行故詩中及之

海子橋西風大作撲面驚砂似飛電塞驢局促驅不前
僕夫睢盱行屢却傍人指點笑相語誰遣先生此行樂
韓公半醉紗帽偏童子竦立高吟肩惟有王郎跛能履
拄杖落手心茫然君平杖頭無酒錢羊市街西尋鄭虔
從此避風如避箭閉門經月不相見剝啄移時始啓關
旋吸清泉沃塵面牆頭濁醪如井泉沈醉不虞歸路遠
城南招提老贊公三日不見心中忡忡回鞭便欲造虛白

驚見斜陽天際紅歸來獨坐增感慨三復平生康節戒
青燈永夜長自憐白首相隨惟影在故山萬里孤雲飛
一身憔悴誰復知從今風雨閒柴扉養取病鶴江南歸

行師見和因再次韻

少年一鼓氣方作出語驚人走冰雹詞林無日不吟哦
騷壇有敵皆奔却怵心劇腎良亦苦抵掌掀髯方自樂
中年始悟學術偏閉門默坐聽息肩徒知出處亦漫爾
未信行藏非偶然畊田而食鑿井飲豈有奪攘并矯虔

暮年忽作弦上箭，楚水吳山得相見。
孤帆一日下渚溪，十年不覩廬山面。
今年又復上燕山，回首家山路逾遠。
東林邂逅逢遠公，常時憫我憂心忡。
祇園共踏寒月白，禪林許看春花紅。
客鄉慎勿生嘆慨，老境情懷須自戒。
萬里休嗟路遠遙，百年但願身長在。
秋風旋鴈將南飛，尺書先報雲山知。
明年春雨黃獨肥，釀泉待我山中歸。

三用韻自警

詩亡然後春秋作，災異不獨書雨雹。
一朝夾谷會強齊，

片言立使萊兵却當時門人誰好學陋巷獨稱顏氏樂
後人往往學術偏自謂聖賢堪比肩董賈猶存二三策
荀揚其然豈其然易經王弼詩鄭玄春秋何休禮服虔
東南之美僅竹箭肅慎楛矢何曾見千載之下得程朱
夢見聖人猶覲面六經自此昭日星伊洛未覺洙泗遠
我生獨後此數公望道未見心中忡忡秋霜暗添短鬢白
春酒不借衰顏紅憂來中夜恒嘆慨猶幸平生守三戒
志勤道遠力已微夙興夜寐心長在春風花開秋葉飛

歲不待人知不知青年幸從君子學白頭庶免小人歸
送郡庠諸貢士會試

聖明紀元首洪武二十三年歲庚午北平貢舉數已三
南宮科第誰為伍朝廷在處興學校河朔于今似鄒魯
燕城自昔號多士黌舍書聲喧兩廡諸生結髮守章句
五夜挑燈坐風雨十年經傳久鑽研一旦雲霄共軒翥
張生蚤誦毛氏詩不泥漢儒專訓詁郭生卅歲學文象
三絕韋編感尼父晉張二子業啖趙頗知褒貶異袞斧

一經直筆重王正三傳闕疑存夏五王郎曾窺孔壁書
古文魯魚參石鼓苑生丁卯已策名三載願學心更苦
諸子同生聖明世聯鑣共上春官部黃河十月水無冰
高帆大艦鳴雙櫓京師人才輻輳地車馬駢闐耀珪組
四夷萬里玉帛朝七旬兩階干羽舞天人三策對大廷
忠孝百年事明主白玉階前集鳳麟黃金榜上題龍虎
錦衣遙歸紫里閭青史流芳照今古老我尚蒙稽古力歲
糜廩粟知何補聖恩浩蕩天地寬要使疲瘥咸得所朽

壤猶能出芝蘭良材自可充梁柱青雲子幸成令名白
首我歸老環堵擊壤康衢樂太平日作歌詩歌舜禹

題高集賢畫

天下幾人學董元近代復數高集賢集賢畫山唯畫意
不將點畫分清妍乾坤元氣尚渾沌百年此意無人傳
我生髫髻受公畫亂離不見三十年大明開天四海一
江山在處還依然欲求公畫不可得夢中往往看雲煙
昔年為客上湘水雲山好處長留連九華秀色開菡萏

匡廬瀑布晴虹懸洞庭雪浪渺無際華蓋曉峯青可憐
今年又上燕山道憑高四望惟青天舟行一月少山色
北風吹沙塵晝昏燭來燕市厭闌闌旦暮車馬爭駢闐
蓬萊真境偶一到拭眼復見公山川當時舊物無一在
嗟我與公良無緣公家子孫今白髮十年湖海相周旋
客鄉邂逅重相遇趣裝又上通州船我家金華山色裏
雲間白石如羊眠柴門小橋枕流水溪聲久不聽潺湲
昨宵又作故人夢耳邊忽似聞清猿松根茯苓如斗大

便欲歸去求神仙安得壺公縮地法南歸道里猶五千
官船利涉急於箭一月可到家山前白頭儻獲遂此願
畊雲自種南山田

和衍公約看杏花詩韻

客鄉不識花時節官舍蕭條如巷陌閉門猶恐迎朝風
况復看花事行樂前年又得殷師疾往往空中聞打麥
回思少年真一夢幸免泥塗陷雙脚非無萬里封侯志
膽落繩橋懸度索亦欲州縣謀斗升束帶晨趨謁方伯

坐是蹉跎四十年不知兩鬢如霜白東鄰有子早宦游
駿馬雕鞍日馳躍西鄰有客亦從軍十載歸來門列戟
書生半世成何事出門却笑天地窄南北驅馳今幾年
猶喜青衫尚如昨去冬十月上燕薊朔風入懷衣縫折
敝裘百日走黃沙縱有清泉誰浣濯平生故人幸相值
一一襟懷皆磊落四海誰非兄弟親百年同是乾坤客
興來載酒數相遇如此客懷良不惡昨宵忽作鄉山夢
便欲飛書謝婁約來春玉版行可參擬約參寥同大嚼

暑雨即事感懷

江南五月黃梅雨，溽暑熏蒸無燥土。
燕山道上走黃塵，不識南中霖潦苦。
今年燕山暑雨多，六月日日聞滂沱。
牀頭汗衣欲沾體，門前流潦看成河。
東家牆頽空四壁，西家水入深三尺。
羣蛙白日堂上鳴，孤螢後夜梁間出。
東薪斗米不論錢，城中比屋無炊煙。
泥塗不異犀浦道，禁火翻同寒食天。
我生炎方困溽濕，不知朔土猶蒸鬱。
朔南由來地勢偏，氣候一月相後先。
我願天公憐遠客，

白頭早遂歸鄉約
祇今溽暑行已過
歲晚苦寒其奈何
七言近體

謁岳鄂王墓

鄂王遺廟空山裏
斜日荒煙澹暮嵐
一死曾微贖身百
孤忠寧愧過河三
戰場有敵皆奔北
冢木無枝不向南
白髮書生謁祠下
巖泉一勺酌芳甘

發龍江

己巳十月

帝城惜別重依依
擢發龍江已夕暉
十月尋常寒食短

孤帆搖颺暮雲飛
天空萬里海青遠
水落三冬淮白肥
却憶故鄉鱸正美
季鷹何事不思歸

儀真舟中

石頭城下雨如煙
倦客不知方醉眠
中宵舟移揚子岸
拂曉人喚真州船
推篷喜見紅日上
望眼欲到青天邊
一夕風波夢中過
百年身世真悠然

廣陵道中

廣陵自昔號繁華
過眼春風一夢賒
商女隔江歌玉樹

仙人騎鶴問瓊花
荒村石屋無歸燕
遠道斜陽有暮鴉
二十四橋明月夜
清光此夜屬誰家

韓信廟

淮陰事業已荒涼
猶幸封侯在故鄉
古廟有碑眠宿雨
長林無樹掛斜陽
曾聞杖策歸真主
安用論功覓假王
千古是非曾未定
英雄回首事茫茫

黃河舟中述懷二首

昔年承召沐恩波
投老飄零感慨多
清夢常時懷絳闕

白頭今日過黃河朔雲鴻鴈來邊塞落日牛羊散近坡
最憶故山茅屋好春風日夜長烟蘿

其二

解纜龍江暮雨寒朔風迴薄楚雲間五更酒醒惟聞鴈
一月舟行不見山半世悠悠孤枕夢百年擾擾幾人間
勞生字內成何事獨羨斜陽倦鳥還

過徐州

十月朔風辭上京孤舟一月到彭城黃河九曲流無盡

白髮數莖猶有情戲馬臺荒沙草合釣魚船小浪花輕
老來不負壯游志又指燕山問去程

霜天早行

茅店雞聲落月孤車聲催我上征途裏裳猶訝刀侵指
拂面不知冰在鬚草屋幾家門尚掩野橋何處酒堪沽
却思曩歲禪房宿日上山牕正擁爐

庚午立春日偶成

一別鄉閭十五年寸心日夜望歸田孤舟暮雨滄江上

茅屋秋風夕照邊
歸夢常時隨越鳥
倦遊何意復幽燕
小樓昨夜東風起
又見天邊斗柄旋

送朱長史致仕還鄉

鳳城曉日軟塵紅
鶴髮承恩出九重
千里鄉關淮水北
五雲宮闕大江東
漢廷清議賢疏傳
楚地耆年重白公
想見到家頻致客
擊鮮釀酒醉春風

春意堂

燕山趙氏隱居好
種德幾年春意深
見客不談當世事

滿腔渾貯活人心紫芝采處雲生袖丹杏開時錦作林
老我故園歸未得時來花下聽鳴琴

登崇文閣

春明試上崇文閣病起猶憐步武輕遲暮遠為千里客
登臨不盡百年情淡雲天外青山小斜日煙中白鳥明
皓首江湖歸未得故園春草又應生

石林為金道遠賦

鶴髮仙翁匪石心何年曾種石為林叅差玉樹參天秀

礪何雲根入地深雨榦有苔常帶潤月枝無葉自成陰
季倫當日何曾見鐵網徒勞海底尋

庚午中秋貢院述懷呈同志

夜久棘闌風露涼盍簪邂逅至公堂百年幾度看明月
千里相逢各異鄉謾把金尊斟綠醕羞將白髮對清光
少年獨羨蟾宮路折桂歸來兩袖香

酬胡季安學正見和

何處玉簫吹晚涼月明如水浸華堂神游自信非人境

清夢長思在帝鄉
天上漏聲傳鳳闕
雲間劍氣射龍光
燕山此夕知何夕
猶醉揚州滿殿香

中秋述懷

去年江上送歸舟
迢遞心隨江水流
千里異鄉猶昨日
一年孤館又中秋
青山有恨能遮眼
白髮無情自滿頭
謾說今宵好明月
清光兩地照人愁

次韻行師約看杏花

去年已負看花約
今歲看花復後期
白社雲深難載酒

彩毫春盡謾題詩
東風有恨埋芳草
香雪無情滿故枝
猶喜家山無恙在
明年歸看未開時

次韻酬衍師

時病頭風未愈
故詩中及之

白首論交得衍公
片雲猶恨隔西東
百年謾說三生舊
十日曾無一笑同
大藥何能消鬢雪
新詩自可愈頭風
歲寒心事如松柏
不學春花旦暮紅

次莊孟敬韻二首

日暮誰令涉遠途
此身天地一蘆盧
清霄無夢追班馬

白日何心校魯魚萬事已師齊物論一愁未有絕交書
故人有意憐岑寂時致香醪為破除

異鄉白首倦長途故里青山守敝廬北上慣看沙苑馬
南行真食武昌魚陶翁晚歲能無酒惠子平生賴有書
白日閉門惟靜坐不教塵土到階除

五言絕句

次鄧伯言思歸詩韻三首

萬里江南客思鄉無限情白頭誰作伴清夜讀書聲

其二

故鄉書不到歸鴈亦無情
猶幸春來好曾無杜宇聲

其三

睡熟山窗白鄰雞殊有情
為憐歸夢好報曉獨無聲

題小畫

夜雪掩柴扉漁舟艤釣磯
開門聞犬吠知是故人歸

題夢桂卷

為舉人賦

鈞天有宮名廣寒
上有桂樹青團圓
剛風迴隔九萬里

何人飛夢游其間乃是螢窗讀書客清夜神遊生羽翼
手擎天上最高枝來向人間占桂籍我聞昔賢曾夢松
他日微應十八公世間萬事有先兆精神交感潛相通
人生出處有定分身外悠悠不須問致身富貴須流芳
青史千年有公論

袁氏族譜詩

生民之初自古先林林勢勢天壤間後來作者有聖賢
制為氏族分姻婭猶慮後世昧本源復著譜牒存簡編

袁氏之先何蟬嫣宣仲起家初氏轅固為博士經術專
盛一名絲或氏爰不知何年定為袁邵公登用遘時艱
垂紳正笏立朝端九重倚賴四海安魏晉而下亦有年
代不乏人秉貞堅石頭忠節貫九泉九原不死愧褚淵
恕已殉唐尤可憐功在社稷垂不刊滋為唐相有圭田
請立家廟嚴豆籩子孫似續遂綿延散居四方日以蕃
鄞邑之族自宋遷近代復有玉堂仙奕葉業儒操槩鉛
珉究六籍益覃研自惟受姓歲二千譜牒散軼伊誰愆

乃述所聞手自箋尚病簡畧弗克全我言禹功始濬川
放諸四海乃滔天春秋書法得牽聯如彼瓜瓞方綿綿
枝牽蔓引相攀援後人繼承能勉旃一傳可至千百傳
我作歌詩知其然子孫世守如真詮

再次行公約看杏花韻

我生獨後邵康節白首黃塵走阡陌興來猶作山水游
不減當年謝康樂歸來讀書茅屋底不悟庭中雨漂麥
往年為客上湘水萬里不異僧行脚東還舊雪又十年

日夜思歸嘆蕭索移舟五湖予范蠡醺酒三高祠太伯
豈無蒼弁情嵐翠亦有洞庭秋月白不問烏飛與兔走
自樂鳶飛共魚躍去年買舟上呂梁橫波利石森戈戟
狂吟不信風濤險浩飲祇恐滄溟窄眼中往往逢故人
謾說人民已非昨去年二月到燕城官河水動冰初拆
解裝孤館深閉門塵纓未暇滄浪濯城西招提雙杏樹
聞道花開亦將落湯休妙語數見招憐我同是江南客
嗟予卧病已旬浹出門不耐東風惡西家蹇驢許相借

明日無風便如約政使飄零滿地香共拾殘英帶冰嚼
追和東坡石炭詩韻奉簡行公

山氓鑿煤山脈斷負煤出穴胷抵胷荒山無人種禾黍
百里舁煤入城換燕城居人十萬家家燒煤勝燒炭
土炕潛陽九地回寒谷凝陰一時散常年此物賤於土
棄置道側無人看今年雪深頗艱得北風排戶勁而悍
閉門兀坐廣文羶經月不效嵇康鍛煩公為我致一車
更借山中之款段

再次前韻述懷旦聞行公積弱為盜竊取故未

句及之

我不學賤夫罔利登壘斷布衣雖敝聊掩骭又不能焚
膏午夜坐窮經虛負流年暗中換北燕南越走萬里所
至嗜好如冰炭故園松菊久荒蕪平生親舊雲萍散白
頭締交廬山遠黃塵每垂青眼看天寒為我致烏薪剛
陽可却頑陰悍側聞豪客夜相過乞取薪芻充冶鍛為
問此客果誰與定知不是踰垣段

行公見和且有石炭之贈用韻奉謝

君不聞百年木作溝中斷又不聞甯戚單衣適至鬻一朝
朝犧尊升廟堂布衣亦有軒裳換世間貴賤良靡常萬
物變化猶銅炭我生不知行路難五十年來任蕭散白
日無事常杜門青山每向牆頭看暮年南北倦奔走炎
雲爍面朔風悍荷公贈我煤專車助我吟哦精鍊鍛諒
無報公青玉案感公意重錦繡段

謝樓則中惠炭

則中名庸
四明人

白頭萬里客幽燕大席猶憐有舊氈客舍尋常饒積雪
帝鄉迢遞邈非煙故人頻致烏薪贈豪室空餘獸炭燃
昨夜西樓瞻斗柄椒花又喜頌新年

次則中見贈韻

海鶴東遊久未還青田芝老白雲寒前身已悟三生石
大藥難逢九轉丹好景每從愁裏過鄉山長在夢中看
百年身世真何物白首勞生未得安

蘿石軒為樓則中賦

海上鰲峯僅一拳綠蘿深護覆春煙風回影轉龍蛇動
月落庭空虎豹眠已喜孤根蟠厚地曾聞五色補青天
摩挲莫問前朝事適見移來五百年

悼袁公安

漕梁三韓萬里城回颿中夜颺風驚身捐魚腹孤忠苦
命落鯨濤一羽輕報國已酬平曰志事親不盡百年情
承家喜有連枝在荆樹春來又發榮

題扇面小景


百尺樓臺十二闌重重簾幕護春寒繁華過眼空陳跡
留得春風畫裏看

斜日池臺生晚涼綠荷萬點蘸波光因思五月西湖路
畫舫紅雲十里香

望魯

我家西江言望東魯雲山邈悠道脩且阻睇白雲兮天
未愴秋風兮延佇西江兮幽幽跂洙泗兮道阻且修愛
而弗見兮我心悠悠道在天地兮何所非魯理會吾心

兮靡間今古我心之存兮繫道之所



尚絅齋集卷五